

01/10/2000

Pupuk perpaduan Islam (HL)

Mohd Fuad Razali

KUALA LUMPUR: Umat Islam perlu mengambil iktibar daripada ibadat haji dengan kembali bersatu dan memupuk semangat persaudaraan.

Perdana Menteri, Datuk Seri Dr Mahathir Mohamad berkata, sikap umat Islam hari ini yang saling bermusuhan dan berbunuhan antara satu sama lain, seolah-olah menafikan mereka satu ummah. Ia tidak mencerminkan semangat persaudaraan dan kekeluargaan seperti yang ditunjukkan ketika mengerjakan ibadat haji.

Sambil menyifatkan ibadat haji di Makkah dan Madinah sebagai peristiwa yang tiada tolok bandingnya di dunia, beliau berkata, pergaduhan dan pembunuhan oleh orang Islam terhadap saudara Islam, dilarang di mana-mana saja dan pada bila-bila masa.

"Tetapi orang Islam secara terang-terang tidak mengendahkan larangan itu. Orang Islam bergaduh dan membunuh sesama mereka di mana-mana saja," katanya ketika merasmikan Persidangan Antarabangsa Panduan Haji yang pertama di Hotel Palace of Golden Horses di sini, semalam.

Persidangan selama tiga hari bermula semalam dihadiri 25 menteri yang bertanggungjawab terhadap hal ehwal agama dan pengurusan haji serta pegawai kanan lebih 50 negara.

Persidangan yang julung kali diadakan di luar Arab Saudi itu anjuran Kementerian Haji dan Waqaf Arab Saudi dengan kerjasama Lembaga Urusan dan Tabung Haji (Tabung Haji).

Persidangan itu bertujuan merumus cadangan dan garis panduan bagi latihan yang berkesan untuk bakal haji sebelum mereka menunaikan haji di Tanah Suci. Ia juga akan membincangkan pelbagai isu berkaitan untuk meningkatkan kerjasama di kalangan negara mengenai perkara berkaitan haji.

"Orang Islam bergaduh dan membunuh sesama mereka di mana saja dan kadangkala mengutuk musuh mereka yang juga beragama Islam sebagai kafir atau murtad bagi menghalalkan pembunuhan terhadap sesama Islam," katanya.

Perdana Menteri berpendapat sikap itu seolah-olah menunjukkan orang Islam kini kembali ke zaman sebelum Islam atau zaman jahiliah apabila suku kaum Arab menganggap kaum mereka asas kesetiaan mereka.

"Mereka akan menyebelahi kaum mereka walaupun apa yang dilakukan oleh mereka salah. Hari ini, mereka bukan saja fanatik kepada negara, malah parti politik mereka dan sanggup berjuang serta melakukan pembunuhan terhadap orang Islam lain.

"Bagi mereka, negara dan parti politik serta kumpulan mereka tidak melakukan kesalahan walaupun mereka jelas melanggar perkara yang dilarang Islam," katanya.

(END)